



AKHBAR	:	HARIAN METRO			
TARIKH	:	15/6/2019	MUKA SURAT	:	13
JABATAN	:	PERHILITAN			
KLASIFIKASI	:	PERHATIAN			

KASIH IBU GAJAH

■ 7 jam selamat anak jatuh longkang



IBU gajah berusaha menyelamatkan anaknya yang jatuh dalam longkang. Gambar kecil, anaknya berjaya dikeluarkan.

Ibrahim Isa
ibrahim@hmetro.com.my

Johor Bahru

Tindakan menyentuh perasaan apabila seekor ibu gajah tidak putus asa dan berusaha mengeluarkan anaknya yang terperangkap di dalam longkang selama hampir tujuh jam.

Difahamkan, anak gajah dianggarkan berusia lingkungan lima bulan itu terjatuh ke dalam longkang berhampiran Stesen Penyelidikan Getah di Jalan Kota Tinggi-Mersing di sini, sejak kira-kira jam 4 pagi semalam.

Bagaimanapun ibu gajah seberat lebih dua tan itu dilihat tidak putus asa dan menunjukkan kasih sayang dengan cuba menyelamatkan anaknya berulang kali.

Pengarah Jabatan Perlindungan Hidupan Liar dan Taman Negara (Perhilitan) Johor, Salman Saaban berkata, pihaknya menerima laporan seekor anak gajah terperangkap di dalam longkang itu pada jam 8 pagi semalam.

"Bertindak atas aduan itu, sepasukan anggota dan pe-



“Usaha berterusan ibu gajah itu bagi menyelamatkan anaknya berhasil apabila anak gajah itu dapat keluar dari longkang besar itu”

Salman Saaban

gawai Perhilitan Bandar Penawar, Kota Tinggi, dihantar ke lokasi untuk melakukan siasatan.

"Sebaik tiba, kami dapati anak gajah itu berusaha menyelamatkan diri dan keluar dari longkang dianggarkan selebar 0.6 meter itu.

"Pada masa sama, ibu gajah itu turut berusaha mengeluarkan anaknya itu," katanya.

Menurutnya, usaha berterusan ibu gajah itu bagi menyelamatkan anaknya berhasil apabila anak gajah

itu dapat keluar dari dalam longkang besar itu kira-kira jam 10 pagi semalam.

Katanya, pemantauan mendapati kesan calar dan darah pada tubuh anak gajah berkenaan dipercayai akibat bergesel dengan dinding longkang simen itu.

"Bagaimanapun, anak gajah itu dalam keadaan baik, aktif dan boleh berjalan dengan baik. Ibu dan anak gajah itu kemudian berjalan masuk ke arah hutan simpan berhampiran.

"Kami percaya dua gajah itu adalah sebahagian daripada kumpulan 30 hingga 40 yang kerap dilihat menceroboh kawasan penduduk kampung berhampiran," katanya.

Ia membabitkan kawasan ladang getah Lembaga Getah Malaysia (LGM), Kampung Lukut, Kampung Bukit Samsu, Kampung Sendayan, Kampung Temenin, Kampung Mawai dan kebun persendirian.